

四庫全書

史部

欽定四庫全書

平定準噶爾方略前編卷二十七

雍正九年冬十月乙卯

親王丹津多爾濟等大破賊於鄂登楚勒

獎賞有差

振武將軍順承親王錫保奏言準噶爾賊人大
策零敦多卜小策零敦多卜多爾濟丹巴等於
八月十一日自華額爾齊斯至索勒畢烏拉克

沁留兵四千以為應援率兵二萬六千來犯科
卜多等處見科卜多察罕慶爾扎卜堪軍營兵
力強盛防守嚴密不敢輕進遂抵克爾倫令賊
將海倫鄂勒錐等領兵三千侵掠喀爾喀游牧大
策零敦多卜之兵向蘇克阿勒達呼屯劄又令
小策零敦多卜之子曼濟領兵三千往鄂爾海
西喇烏蘇等處劫掠牲畜九月二十日臣令王
丹津多爾濟額駙策凌等合兵邀擊賊於蘇克

阿勒達呼二十一日至鄂登楚勒達台吉巴海
等領兵六百名夜入大策零敦多卜賊營擒賊
三人而還大策零敦多卜遣賊將袞楚扎卜錫
喇巴圖魯率兵三千來追巴海等誘至鄂登楚
勒大營二十二日王丹津多爾濟策凌列陣力
戰自辰至午斬賊將喀喇巴圖魯其錫喇等俱
負重傷率賊敗遁我兵復擒殺數百餘賊是夜
大策零敦多卜等即移營台西里山二十五日賊

將曼濟兵亦敗北歸營俱自哈卜塔克拜塔克
一路遁去臣等伏思逆賊乘機深入分路侵犯
妄思劫掠仰荷

皇上天威王丹津多爾濟額駙策凌等奮勇進剿直抵
賊巢斬獲無算臣等現在選兵追襲其有功將
士查明再奏奏入得

旨喀爾喀副將軍親王丹津多爾濟郡王額駙策凌等
率領喀爾喀弁兵奪勇爭先戰敗準噶爾擒殺追剿

甚屬可嘉丹津多爾濟從前効力已加恩封為親王
著賞銀一萬兩郡王額駙策凌晉封為和碩親王亦
賞銀一萬兩扎薩克圖汗親王策旺扎卜雖未歷戰
陣在軍營同順承王宣力辦事亦賞銀五千兩其餘
王貝勒貝子公衆台吉官員兵丁內懋著勤勞者著
順承王查明具奏加恩優賞

丙辰

順承親王錫保奏撤兩路追襲兵

錫保奏言前於鄂登楚勒大敗賊兵臣等隨選滿洲蒙古兵四千名令王丹津多爾濟額駙策凌等分路追擊今據王丹津多爾濟等報稱大兵登達勒畢山瞭望並無賊踪計賊人由台西里遁去已過阿爾台山難於追擊應即撤兵又據扎薩克圖汗親王策旺扎卜報稱協理台吉拜都卜等率兵追賊過察罕布爾噶蘇至通奇爾見賊人已由必濟巴爾楚克兩路過阿爾台

聞

山嶺遁去不能追及應亦撤兵奏入報

丁巳

順承親王錫保奏獲噶爾丹策零偽書

錫保奏言據額駙策凌咨稱有親王喇嘛扎卜
旗下人額林陳從策零敦多卜營中被我兵擒
獲隨嚴加訊問據稱從前於和通淖爾交戰時
為賊所擄今策零敦多卜遣令齋噶爾丹策零

書一封送致王喇嘛扎卜書內稱我等原係同居一處素相和好因噶爾丹博碩克圖汗與爾等不睦遂各散處今爾等投順中國當差納貢深為爾等憾之爾等本清吉斯汗後裔並非屬人何不仍移游牧於阿爾台與我同居以聯舊好如有兵戎協力相拒等語今齎原書呈

覽奏入報

聞

寧遠大將軍岳鍾琪奏禦洮賚賊兵事宜

岳鍾琪奏言烏克嶺卡倫乃通哈密及五堡
要路其附近有庾集卡倫今據庾集卡倫遊擊
哈仁鳳報稱有賊四五百人侵犯烏克嶺傷
擄坐卡兵丁即前往洮賚一路等語臣思賊人
敢在洮賚逗遛必非無故或以大隊犯吐魯番
今此賊衆探信或因北路有事料我軍前往應
援令此賊衆窺伺預伏大隊乘虛竊發或欲犯

我西路以此為誘令我軍追擊墮其伏中今臣等已行知哈密加意防守並將馬匹收入城中諸事嚴備倘賊兵勢衆則堅壁以挫其鋒若為數無多即行勦殺斷不敢貪功妄動有負委任奏入報

聞

戊午

命查勘察哈爾養贍生計

上諭大學士等曰八旗察哈爾俱累世効力之舊人從
前征討南方勦滅噶爾丹並隨圍出獵以及數年用
兵於準噶爾宣力之處不可枚舉此次達什率領察
哈爾兵一千名較衆先到軍營又擊敗準噶爾賊人
策零敦多卜等奪回駝馬等物甚屬可嘉昨厄魯特
大臣來京奏稱舊察哈爾人等之生計反不如新厄
魯特等語朕聞之惻憫今沿邊居住之蒙古並王大
臣等放馬之蒙古多有伊主不能養贍者似此生計

艱難朕心不忍爰命大臣前往查勘令伊等各得養
贍將朕此旨通行傳諭

訓勉靖邊大將軍傅爾丹等

上諭傅爾丹等曰爾等在科卜多地方恃勇輕進墮賊
詭計致失地利損兵折將軍前獲罪我朝例所不貸
本應執法究治但傅爾丹整頓餘兵回至科卜多地
方固守城池賊衆并力來犯復能列陣以待賊人遠
遁隨即遣兵各處截殺奪回被掠馬駝此次擊賊可

贖爾等前罪今朕已盡行寬免惟陳泰罪不可宥爾等嗣後須黽勉効力朕自格外加恩

十一月庚申

命寧遠大將軍岳鍾琪籌畫吐魯番遷移撤兵事宜
上諭大學士等曰昨據順承親王及傅爾丹等奏報知
北路賊兵已退邊境寧謐已寄知大將軍岳鍾琪令
其不必發兵往阿濟必濟矣但思賊兵雖離北路冬
間或向西路自應仍前防範至於吐魯番屢拒賊兵

賊人銜恨將來擾害吐魯番勢所必有今雖暫派官兵三千名駐防然究非長久之策回民應否遷移官兵何時可撤著岳鍾琪悉籌畫具奏

命籌和托輝特遷移事宜

上諭大學士等曰此次喀爾喀兵丁丹津多爾濟額駙策凌等率領征討並未奏有和托輝特貝勒班第之名伊之游牧在何處輝特公巴濟已叛降準噶爾喀爾喀公通摩克之游牧又不知如何今喀爾喀等之

游牧俱已內移若和托輝特移住之地嚴密完善令其居住如稍有可虞即令東移

命加賞袞布暨所屬兵丁

上諭大學士等曰額駙阿寶之子袞布帶伊屬下兵五百名効力行間勤勞懋著朕曾降旨與岳鍾琪令其撤回原游牧處以示寬恤今據岳鍾琪奏稱此軍在營甚有裨益仍請留駐等語朕念此兵効力已久理應撤回但時值冬寒不便遽撤著暫在軍營俟來年

青草發生時再令回伊游牧處從前已加恩賞著岳鍾琪再添給銀兩並傳諭額駙阿寶知之

班禪額爾德尼貝勒頗羅鼐助獻軍需

命如值償之

辦理西藏事務護軍統領馬拉額外內閣學士

僧格奏言班禪額爾德尼貝勒頗羅鼐遣使齋

酥油炒麵牛羊乾糧等物以餉大軍臣等屢却

之請並力今收受分賚官兵得

旨馬拉僧格可將班禪額爾德尼頗羅鼐所送之物核
算價值充裕給與銀兩並傳諭伊等朕遣兵在藏駐
劄特為衆唐古忒防守地方使之寧謐豈有絲毫貽
累之理今所送諸物勢必在伊屬下衆人攤派未免
滋擾且我兵糧餉並不缺乏無須幫助此番給還銀
兩並非外視爾等也可傳諭唐古忒咸悉朕意

辛酉

命派將士駐歸化城

賞賚有差

上諭大學士等曰派往歸化城兵二千名著副都統綽爾多同瑚琳帶往綽爾多著賞銀三千兩準備起程乾清門侍衛南岱授為一等侍衛於虎鎗上行走之索倫新滿洲內挑選九名令伊統領隨此次兵丁前往照看馬畜每人賞銀二百兩至一切應得之項仍照出征官兵之例給與

黜正白旗蒙古副都統馬哈達以副都統宗室

諾穆柱代仍留軍營

壬戌

命馬爾賽率漢軍兵駐扎克拜達里克並酌綠旗兵分
隸留住遣回事宜

上諭大學士等曰從前曾令漢軍兵四千名即在歸化
城過冬現今賊雖敗遁明年或又來侵犯宜預為防
範此四千兵丁俱熟練鎗礮之技令其看守城垣甚
有裨益今於年內預備妥協揀擇吉日馬爾賽統領

由上海一路按程至扎克拜達里克駐劄又

諭曰扎克拜達里克處發遣人犯俱著從寬免罪即令充為綠旗兵丁給與糧餉在彼効力年過六十以上有情願當兵在彼居住者留作兵丁其並無妻子已過六旬願回內地者俟城工告竣夫役回來時將伊等由驛站從容發回各歸本籍

癸亥

靖邊大將軍傅爾丹奏報率兵往察罕度爾日

期

命順承親王錫保掌靖邊大將軍印傳爾丹掌握武將

軍印

傳爾丹奏言臣等公會商以十月十三日大
兵自科卜多城起程弁兵各給口糧所有帑銀
六十八萬七千三百兩分令各大臣官員兵丁
攜帶並將火藥鉛子均勻馱載就近由布魯爾
烏哈勒扎沿途食雪向察罕度爾進發十月十

七日至綽諾海喇琥據振武將軍順承親王
咨稱九月二十二日戰敗賊夷大策零敦多卜
等俱已逃竄喀爾喀副將軍等分路速追因賊
夷已踰阿爾台山嶺即撤軍回營等語臣遂統
率大兵選擇水草休養馬匹往察罕廋爾緩行
至奎通烏蘭又咨稱驛站俱已接續所有軍機
事件應仍由大將軍處奏

聞不必據咨轉奏所有臣等回赴察罕廋爾領兵起程

日期理合繕奏得

旨傳爾丹既至察罕廩爾著將靖邊大將軍印交順承親王掌管振武將軍印著傳爾丹掌管協同順承親王辦理事務

甲子

訓飭振武將軍傳爾丹

上諭大學士等曰爾等可傳諭傳爾丹伊原與順承親王不合王諸事並無過失近日傳爾丹輕進以致虧

損官兵若大將軍印務仍命管理非但衆心不服即
傳爾丹心亦不安伊既失蒙古等之心綠旗兵丁亦
未必孚信伊所恃者惟數索倫耳豈知首先潰散幾
致伊於危殆者即索倫乎順承親王諸事遵朕指示
領大兵在察罕度爾賊夷懼其聲威不敢侵擾旋即
敗遁朕今令傳爾丹為王協理以贖前愆至殲賊立
功惟王是賴傳爾丹宜悉心盡力勉圖報効若仍執
前見妄存私意與王不和不但無益於國家傳爾丹

恐益增罪戾矣

命約束發往扎克拜達里克漢軍兵丁

上諭大學士等曰朕聞漢軍兵四千名自京至歸化城
傷損馬駝甚多及至歸化城變賣衣物任意費用甚
屬不堪且路途尚近即如此窘迫亦甚屬懦弱著行
文馬爾賽此次領兵大臣等若不加意統攝致兵丁
仍蹈故轍或有逃回者馬爾賽即行拘拿應懲治者
懲治應正法者正法再行文歸化城都統丹津右衛

大同宣化等處總兵官凡兵丁家人內有逃回者拿獲奏聞即行正法其不加約束之大臣官員從重治罪馬爾賽將此曉諭大臣官員兵丁知之此兵到扎克拜達里克地方馬爾賽加意操演嚴行約束

乙丑

議扎克拜達里克等處分路駐兵

命馬爾賽為綏遠將軍

大學士等議奏言扎克拜達里克地關險要馬

爾賽率漢軍兵四千名往彼駐劄應分為八隊
諾爾琿富昌帶領首隊於十二月初一日啓行
李杖祖秉衡佟時茂劉汝林各領一隊隨後其
餘二隊令馬爾賽於營總內選擇二人各領一
隊馬爾賽領後隊於十二月初八日啓行殿後
倘遇嚴寒大雪難行即在推河等處駐劄俟明
歲春融再至扎克拜達里克馬爾賽啓行後撫
遠大將軍印交送康親王暫管另以一印給馬

爾賽其領兵至扎克拜達里克時與欽拜阿成
阿等所領之兵俱聽順承親王調遣察罕廋爾
處所有盛京烏拉及索倫新滿洲等兵應令順
承親王在內酌派數百名遣往馬爾賽處充哨
探瞭望等役至歸化城亦屬緊要俟馬爾賽至
扎克拜達里克時即令馬爾賽將圖爾賽等所
領土默特兵一千名遣回歸化城圖爾賽席爾
塔仍令同僧衮扎卜等統領喀喇沁兵一千名

由扎克拜達里克以至十三臺處分駐照看臺
站察罕處爾處調扎薩克兵二千名令其駐劄
推河京城所派瑚琳綽爾多帶往之兵二千名
令其於本月擇日啟行前往歸化城俟到彼時
精選一千名於二月間令侯馬蘭泰副都統達
爾濟瑚琳統領往鄂爾昆西形勝之地與扎薩
克兵合為一處駐劄其餘兵一千名令副都統
綽爾多統領在歸化城駐劄再派四子部落毛

明安喀爾喀烏喇特鄂爾多斯兵二十名令鄂爾多斯王查木陽四子部落王阿喇卜坦多爾濟統轄又選派察哈爾厄魯特兵各二百名令總管雅圖統領俱於明年二月前往烏喇特西界形勝之地駐劄奏入得

旨依議馬爾賽著給與綏遠將軍印阿克敦等即令隨馬爾賽前往辦理印務

丙寅

訓諭喀爾喀青海汗及王等

上諭喀爾喀汗王貝勒貝子公扎薩克台吉並各屬下
人等曰近日準噶爾賊夷噶爾丹策零寄信與王喇
嘛扎卜稱喀爾喀厄魯特法教相同本屬和好及噶
爾丹博碩克圖時失睦既而我父追念前好曾屢奏
皇帝乞將喀爾喀青海復舊安置今皇帝欲將我如
喀爾喀青海入於旗下佐領之內給與封號以故我
等興兵至此若能成事則將喀爾喀青海照舊安置

即不能成事亦不令統屬於人等語此實賊夷奸詐
離間之詭計從前爾喀爾喀人等被噶爾丹戰敗以
致失地我

聖祖皇考憫念爾等歸誠存恤愛養將喀爾喀諾顏等
按伊原品封為汗王貝勒貝子公扎薩克屬下人等
俱各賜生業安享富饒令歸原游牧處爾等之感恩
報德同心効力乃人所共悉者準噶爾賊夷出狂悖
之言借安置爾等為辭欲肆行擾亂即論爾等之封

號親王郡王貝勒貝子等爵位俱係我朝冊封宗室
子孫兄弟之號其餘臣下雖効力立功並無封貝子
之例惟四十九旗扎薩克清吉斯汗之後博爾濟錦
氏台吉等誠心歸順我

太宗皇帝俱賜以宗室封號視如骨肉結為姻親累世
榮寵何嘗視為奴僕乎至編設旗分佐領亦欲其易
於查考以便加恩並恐扎薩克等互起爭端之故今
已及百年何嘗役使爾等一人乎自分旗以來爾喀

爾喀之鄂托克達魯哈等屬便於查管遇饑饉則賑濟之行圍出兵則厚賞之可有催徵之事乎此亦爾等所共知者準噶爾賊夷奸詐狡獪外托黃教而擾亂藏地違背教原口雖稱為青海喀爾喀兩家而又搶掠爾等將胡土克圖俱欲搶奪奸惡極矣且準噶爾一姓自額爾柏克尼古勒蘇克齊汗之後興兵擾亂諸部落殘殺博爾濟錦氏幾至斷絕至今讐怨未已今策零敦多卜前來被爾喀爾喀等勒殺敗遁賊

夷懷恨必深思欲報復乘隙擾亂若賊夷之事不定則爾喀爾喀不得安衆蒙古亦不得安朕是以不惜國帑發數萬大兵遠行征勦綏靖邊圉祇為爾等生全之計也爾屬下人等宜仰體朕心各加奮勉藉朕威力效法此次進兵之王貝勒貝子公台吉等朕必為爾等勦滅賊夷永保安寧前者噶爾丹作亂時爾等互為搶掠盜竊今又有搶掠盜竊者此種惡習甚屬愚賤其務力為梭改且爾等既屬內地多年共知

法度若舍棄游牧擅行掠竊干犯王章何不力戰敗夷立功雪恥乎即爾等歸順賊夷亦斷不能保全爾等令爾等安享也爾等宜熟計之又

諭青海王貝勒貝子公扎薩克台吉等曰近日準噶爾賊夷遣策零敦多卜二人領賊衆越阿爾台來侵喀爾喀欲搶掠克爾倫及刼取哲卜尊丹巴胡土克圖被喀爾喀副將軍王丹津多爾濟額駙策凌等率兵分路迎擊勦殺生擒並獲其駝馬賊夷敗遁因轉思

離間寄書與喀爾喀善巴戴青王之孫王喇嘛扎卜
希圖誑誘擾亂成事喀爾喀深知賊夷詭計父子前
後一轍忿怒痛恨不改初心今爾青海台吉等久荷
聖祖皇考冊封位號褒寵顯榮歷有年所至於編設旗
分以便稽查賞賚復恐扎薩克以強凌弱互起爭端
譬之厄魯特內有得秦者有鄂拓克者有扎薩古勒
者有得木齊者皆為易於管轄而已爾有饑饉朕必
加周給隨獵行兵必加賞賚從無徵輸爾蒙古者朝

廷恩典至優至渥矣若以封號旗分為賤亦可奏明酌改且爾厄魯特之台吉阿巴賴諾顏之子孫現在準噶爾處果為帥領乎抑為屬下乎即如羅卜藏丹津降附賊夷即將伊所屬分散為奴較之受天朝封號孰榮孰辱準噶爾原係清吉斯汗之奴隸爾等俱係清吉斯汗之弟哈布圖哈薩爾之子孫若以博爾濟錦氏諾顏等之先世論之準噶爾乃爾等之奴隸也奈何甘心自屈受制於奴隸乎可自思之爾等當

知賊夷詭計勸諭屬下分別利害令其亦如喀爾喀等之奪勇立功豈可甘為懦怯受賊夷蹂躪乎朕因準噶爾反間致書故又諄諄降旨爾等如能遵行則可以保全妻子游牧永享安寧之福矣

丁卯

上諭大學士等曰科卜多兵丁回至察罕廋爾時著烏察喇暫留軍營索泰來京塔爾岱回原任

命厄魯特貝勒多爾濟塞卜騰內移

上諭大學士等曰準噶爾賊人策零敦多卜等寄字與
貝勒多爾濟塞卜騰原欲傾陷多爾濟塞卜騰欲行
離間之意也多爾濟塞卜騰受朕恩甚重伊亦感激
効力豈肯墮其術中但伊屬下人等原非伊之屬人
與伊不和若仍在喀爾喀游牧地方難以居住爾等
寄信多爾濟塞卜騰令伊父子向內移住朕加恩給
與生業將準噶爾賊人所寄之信並與多爾濟塞卜
騰觀之

戊辰

命籌阿濟等處駐防事宜

上諭大學士等曰王丹津多爾濟具奏據投誠之厄魯特多爾濟供稱噶爾丹策零現在華額爾齊斯游牧因有哈薩克之人常來搶掠馬畜殺擄人衆是以噶爾丹策零親統兵一萬在游牧外相隔一日路程防守等語查華額爾齊斯與伊犁甚遠而云噶爾丹策零在彼游牧此言固屬謬妄但策零敦多卜領兵現

在華額爾齊斯居住不可不預為防範阿濟必濟乃賊人出入之要路今廷臣議稱阿濟必濟在西北兩路軍營之間應駐兵二三千名防守堵禦朕思阿濟等處與巴里坤相隔二三百里從前朕屢降諭旨令岳鍾琪但經理西路之事而不必防及北路者因彼時賊人情形似欲專擾西路也今賊人既盤踞華額爾齊斯則其意全在北路矣若岳鍾琪以大將軍擁兵四五萬而但坐鎮無事之堅城於理可乎然廷議

於阿濟等處駐兵二三千名朕意以為兵數太少必
得萬餘名方為有並爾等行文於岳鍾琪詳悉妥議
具奏至十月間烏克克嶺卡倫被賊擄去兵丁賊人
直至南山一帶盜竊馬匹我軍四五萬駐劄巴里坤
一聞賊信將馬匹收入城中塔勒納沁離營不過二
三百里而不能保護馬匹仍聽賊徒肆行無忌大將
軍與數萬官兵未知所司何事爾等行文併及之

已已

上諭大學士等曰前派出烏喇特西界駐防之鄂爾多斯王查木陽四子部落王阿喇卜坦多爾濟著來京請旨

命員外郎齊里克特閱視喀爾喀游牧

上諭大學士等曰前聞喀爾喀公通摩克被賊搶擄向內遷移游牧但未知遷於何處著派員外郎齊里克特往通摩克游牧處將通摩克及伊屬下人內有知曉阿濟必濟等處路程之人一並帶赴京城其附近

居住之扎薩克等游牧一併閱看

擢正藍旗滿洲副都統達爾濟為鑲黃旗護軍統領仍

留軍營

庚午

加賞巴里坤等處將士

上諭大學士等曰巴里坤所有阿寶屬下之兵甚屬効力已降諭旨加恩賞賚其鄂爾多斯之五百兵丁亦甚効力因彼處不可無蒙古兵丁是以將此五百名

兵仍留於巴里坤著大將軍岳鍾琪照賞賜阿寶兵
丁之例賞給其歸化城之土默特兵一千名朕原擬
三年撤回今尚未能即撤此土默特之官員兵丁歷
年各處派撥亦甚勤勞著大將軍岳鍾琪亦加恩賞
賚其領歸化城兵丁前去之都統根敦先於阿爾台
出兵効力十有餘年今又領兵前往朕甚嘉之欲另
行更替一時未得其人今特頒恩賚將朕元狐冠一
頂貂皮短褂一件狄袍一件銀二百兩賞賜根敦

辛未

命侍衛圖勒車等閱視山丹口等處屯駐事宜

上諭大學士等曰自甘州山丹口肅州金塔寺至額濟
內古爾鴈坤都倫阿濟達巴漢薩克薩圖古里克洪
郭爾阿濟爾罕白格爾等處路程著侍衛圖勒車嚮
道侍衛法籌原任協領根敦扎卜等馳驛前往肅州
將每站水草路程里數可否設臺運糧駐兵及有遼
濶平坦地方可否屯田並賊衆自阿濟前來路程詳

悉看明具奏歸時仍從坤都倫進山丹口其涼州邊
內路程一併詳細閱看圖勒車等每人賞銀三百兩
命順承親王錫保同振武將軍傅爾丹酌撥各路弁兵

分駐

傅爾丹奏言臣率領大兵於本月初六日已至
察罕廈爾京師滿洲兵臣自行統率在察罕廈
爾之東巴顏布拉克過冬歸化城土默特之兵
令於王桑里達居住之濟斯布隆附近駐劄盛

京吉林右衛察哈爾喀喇沁土默特綠旗兵離
滿洲營相去五里次第安營黑龍江兵令在大
營之北扎哈蘇台呼濟爾圖駐營防守奏入得
旨交辦理軍機事務大臣等議奏尋議本月初四日靖
邊大將軍印既令順承親王掌管應行文順承
親王將各路弁兵擇地屯劄之處會同傅爾丹
酌量辦理

上從之

平定準噶爾方略前編卷二十七

欽定四庫全書

史部

平定淮噶爾方略前編卷三十一

詳校官監察御史_臣孫家賢

通政使司副使_臣莫瞻菴覆勘

總校官進士_臣朱鈐

校對官中書_臣李斯咏

謄錄監生_臣李亭植

欽定四庫全書

平定準噶爾方略前編卷二十八

雍正九年冬十一月辛未

勅諭靖邊大將軍順承親王錫保

勅曰奉

天伐罪治世之常經鋤暴除荒安邊之遠略逆賊噶爾丹

策賚者狂悖冥頑父子濟惡妄欲侵陵我屬國窺伺

我邊陲包藏逆心狡焉思逞若不深加懲創實為衆

蒙古之巨害是以命爾為靖邊大將軍統領滿洲蒙古綠旗大兵一切事宜爾與副將軍和碩親王丹津多爾濟和碩親王和碩額駙策凌振武將軍傅爾丹等酌定方略公同計議而行勿謂已能而不納衆論勿當事會而致失機宜勿恃兵強而輕視賊寇密偵遠探備極周詳各路大兵及蒙古兵丁聽爾調遣凡遇有警即遣發官兵應援撲勦有能擒斬賊首者奏聞加恩優賞有情急來歸者加意撫恤其不抗拒官

兵者毋加殺戮兵將所過地方須申嚴紀律毋得騷擾百姓毋得淫人婦女毋得離散人之父子夫婦毋得損壞人之墳墓室廬毋得強取貨物毋得驅役平民其或有臨戰退縮貽誤擾亂軍機者爾會同商議文官四品以下武官三品以下即以軍法示衆官兵有犯小過者會同商議徑行處治毋泯沒戎行之勞績毋寬縱違法之弁兵法紀務極嚴明賞罰悉期公當一切機宜爾商酌調遣振武將軍傅爾丹綏遠將

軍馬爾賽俱聽爾調度有應知會西路寧遠大將軍者即行知會一同辦理爾其嚴重精詳殫心奮力克奏膚功永清邊徼以副朕戡亂靖逆安民綏衆之至意欽哉故勅

甲戌

加賞駐劄昂古里將士有差

上諭大學士等曰副都統黑色帶領在昂古里駐劄科爾沁之兵離家二年効力行走領兵之科爾沁台吉

袞濟扎卜教漢台吉羅卜藏著各賞元狐帽一頂捨
狝猱馬褂一件其餘台吉管旗章京副章京等各賞
銀三十兩叅領佐領等各賞銀二十兩驍騎校等各
賞銀十兩兵丁各賞銀五兩

丁丑

給頗羅鼐銀印

大學士等議奏言據辦理西藏事務護軍統領
馬拉等奏言頗羅鼐蒙恩授為貝勒又令辦理

前藏後藏噶卜倫事務今具稟懇求印信以便
行文該管地方與軍機調發事務應如所請令
禮部鑄給辦理衛藏噶卜倫事務多羅貝勒銀
印一顆交於頗羅鼐掌管奏入

上從之

戊寅

命順承親王錫保辦理北路弁員陞補事宜

上諭大學士等曰各省出征之員未能即回本任者前

曾降旨著於十缺之中分出三缺為出征弁員陞補之缺西路交與岳鍾琪北路交與馬爾賽題補今馬爾賽授為綏遠將軍領兵駐劄扎克拜達里克其靖邊大將軍印務已交與順承親王掌管嗣後題補北路弁員著順承親王辦理

庚辰

命復旺扎爾貝勒原爵

上諭大學士等曰喀爾喀郡王旺扎爾前因追殺逃走

之烏梁海由貝勒封為王爵去歲軍營送駝悞期經
部議黜革此次出兵著賞給旺扎爾貝勒原爵同公
策凌旺布領兵前往

甲申

命加賞領兵往歸化城之副都統綽爾多銀二千兩管
轄索倫兵丁之侍衛博爾本察銀一千兩

乙酉

命給貝勒策登扎卜等屬人產業扎薩克圖汗策旺扎

卜等所失官駝馬免其賠償

上諭大學士等曰朕去歲屢降諭旨令喀爾喀等將妻子牲畜向內遷移於嚴密處居住乃並不預行遷移以致貝勒策登扎卜等旗分被賊劫掠牲畜傷損皆不能遵旨之故耳昨傳爾丹奏請將策登扎卜之屬下分給衆喀爾喀等養贍據此辦理甚不妥協應查明戶口給與產業今扎薩克圖汗策旺扎卜奏請將伊等被掠之官馬官駝令伊部落內照數賠補策登

北卜屬下之人被賊擄掠朕深為惻然正欲施恩豈
有著落伊等賠補牲畜之理著俱寬免交與王丹津
多爾濟報銷

丙戌

命厄魯特貝勒多爾濟塞卜騰內移

大學士等議奏據靖邊大將軍順承親王錫保
奏言厄魯特貝勒多爾濟塞卜騰呈稱今年率
領所屬遷過推河不料台吉索諾木吹濟引誘

屬下四十餘戶一同叛逃現今所餘之人亦屬
難信請率令伊等向內遷移至歸化城等處游
牧居住應如所請奏入

上從之

戊子

命追封一等搭布囊丹巴為輔國公

大學士等議奏據傳爾丹奏稱管領喀喇沁兵
一等搭布囊丹巴從軍勦賊衝鋒力戰受傷入

骨今因傷發病故臣等遵

旨從優議卹或贈為扎薩克一等塔布囊或授為輔國

公恭候

欽定奏入得

旨丹巴著追封輔國公世襲罔替

十二月辛卯

酌遣寧夏滿兵回本營

上諭大學士等曰前將寧夏滿洲兵丁派撥一千名往

西備備用今巴里坤大營已有滿漢兵三萬四千餘
名其寧夏滿兵應令仍回本營著將軍卓鼐挑選一
百名留在軍營聽用其九百名於明年春間著伊禮
布帶領回至寧夏

以一等伯欽拜為內大臣副都統阿岱為正紅
旗護軍統領俱仍留軍營

壬辰

命封西藏一等台吉噶錫巴那木扎爾塞卜騰為輔國

公

上諭理藩院曰西藏一等台吉噶錫巴那木扎爾塞卜騰具奏謝恩進獻方物從前因伊父噶錫鼎於阿里地方陣亡經頗羅鼎奏請將噶錫鼎贈為一等台吉令伊子噶錫巴那木扎爾塞卜騰承襲聞噶錫巴那木扎爾塞卜騰甚是勤勞効力伊又係康濟鼎之兄子康濟鼎誠心効力始終不懈並無子嗣今將噶錫巴那木扎爾塞卜騰格外施恩封為輔國公世襲罔

替

寧遠大將軍岳鍾琪奏報巴里坤圖古里克等處屯田獲青棵三萬六百八十石有奇奏入得旨下部知之

戊戌

靖邊大將軍順承親王錫保奏報鄂爾昆等處屯田獲麥糜一萬六百三十石有奇奏入得

旨下部知之

庚子

命步軍統領阿齊圖等派領東路喀爾喀兵至軍營

上諭理藩院曰東路派喀爾喀兵三千名著步軍統領
阿齊圖去令侍讀學士查克旦與阿齊圖協同辦理
此派出兵丁每人賞銀五兩令查克旦同二等侍衛
阿敏道帶領至大將軍順承親王軍營照王指示之
處駐劄仍令兵丁等不時操演

甲辰

賞賚寧古塔副都統塔爾岱仍留軍營

靖邊大將軍順承親王錫保奏言據寧古塔副都統塔爾岱呈稱

皇上恩旨念塔爾岱宣力可憫令回原任但大兵正值滅賊之期是塔爾岱報國雪恥之日若負罪而還無顏復見老母仰懇仍留軍前等語謹此代奏奏入得

旨朕覽塔爾岱所奏為之惻然若准伊所請朕實不忍

若不准則軍中難得此練習之賢將今暫依所請賞
伊母銀一千兩再賞塔爾岱一千兩資伊用度

乙巳

上諭大學士等曰侍讀學士查克旦現今派往喀爾喀
地方操兵防範著給還侍郎原銜

丁未

降紀成斌為沙州副將以顏清如代之

上諭大學士等曰紀成斌久歷戎行曾有戰功是以朕

加恩用至總兵官後因大將軍岳鍾琪極力保薦謂其可以大用始將伊擢用四川提督令在西路協贊軍務上年岳鍾琪來京陛見將大將軍印信交與紀成斌護理乃紀成斌隄防疎忽為賊人所窺始則盜竊馬駝既則逼近軍營無所忌憚此時紀成斌一籌莫展幸賴樊廷等奮力出擊以寡敵衆大挫其鋒而賊衆始退紀成斌之罪誠擢髮難數朕猶暫寬其罪俾得黽勉効力以贖前愆乃伊一年以來怠忽遂巡

每見欽差大臣但言我實係巴里坤弁兵之罪魁紀
成斌有忝職守深負朕恩著革去提督改為副將交
與岳鍾琪凡有差遣之處令其効力贖罪若仍不知
愧悔著即叅奏嚴究四川提督著陝西延綏總兵官
顏清如補授陝西延綏總兵著陝西沙州副將張豹
補授紀成斌著補授陝西沙州副將

加賞鄂爾多斯王查木陽等

上諭大學士等曰派出古爾班賽堪地方駐防之鄂爾

多斯王查木陽四子部落王阿喇卜坦多爾濟著名
賞銀一千兩鄂爾多斯台吉策旺多爾濟額默根索
諾木著各賞銀五百兩征勦準噶爾賊人喀爾喀貝勒
策卜登賞元狐帽一頂貂皮馬褂狄袍各一件銀五千兩
命副都統銜馬哈達等築扎克拜達里克等處城垣

大學士等奏請派員赴扎克拜達里克推河翁
吉三處修築城垣奏入得

旨扎克拜達里克地方著副都統銜馬哈達原任巡撫

圖理琛等前往推河地方著副叅領桑吉柱等前往
翁吉地方著原任將軍來文等前往

以加副都統銜阿成阿為都察院左副都御史
加侍衛瑚習禮副都統銜俱仍留軍營

以寧古塔副都統塔爾岱為內大臣在軍營叅
贊行走

戊申

陞正藍旗前鋒參領阿那布為本旗蒙古副都

統仍留軍營

庚戌

封喀爾喀扎薩克輔國公阿努里為固山貝子

壬子

命復貝勒阿寶郡王爵

上諭大學士等曰貝勒阿寶並伊子衮布在西路軍營甚屬効力阿寶又帶所屬兵丁防範游牧殊為可嘉著賞還伊郡王原爵

命左副都御史阿成阿為綏遠將軍馬爾賽叅贊

癸丑

命喀爾喀郡王敏珠爾多爾濟等來京

大學士等遵

旨議覆據靖邊大將軍順承親王錫保叅奏喀爾喀郡

王敏珠爾多爾濟扎薩克台吉成衮扎布調往

軍營逗遛不至扎薩克一等台吉鄂木布濟擅

離汛地回往游牧罪難寬宥請將伊等郡王台

吉俱行革退奏入得

旨王敏珠爾多爾濟之祖墨爾根濟農顧魯什布乃喀
爾喀內首領扎薩克從前恭順進貢後遇噶爾丹之
亂甚屬効力此次調兵敏珠爾多爾濟遲悞未到或
有別故著將敏珠爾多爾濟成袞扎布調取來京扎
薩克台吉鄂木布濟旣派在庫卜克爾地方駐劄伊
聞賊信私離汎地罪不可赦猶能保守伊之游牧未
被賊掠尚屬可矜著將鄂木布濟亦調取來京俱俟

朕面詢後再降諭旨

寧遠大將軍岳鍾琪奏報哈密塔勒沁等處
屯田收穫青稞麥子共五千石奏入得

旨下部知之

丙辰

以護軍統領達爾濟為將軍駐古爾班賽堪

上諭大學士等曰古爾班賽堪地方駐滿洲蒙古兵五
千名甚屬緊要護軍統領達爾濟著給與將軍印信

令其總統鄂爾多斯王查木陽四子部落王阿喇卜
坦多爾濟俱授為副將軍原任散秩大臣四格巴咱
爾原任侍郎傅鼐俱賞給原銜與副都統瑚琳並在
叅贊上行走達爾濟現在歸化城著減從馳驛來京
面請訓旨再赴軍營

戊午

和托輝特貝勒班第奏報移駐塞楞格河
靖邊大將軍順承親王錫保奏言臣遵

旨遣人詢問和托輝特貝勒班第現在移駐地方今據
呈稱本年秋間因準噶爾逆賊來犯由原駐桑
金達賴等處東遷至塞楞格河北山額格地方
駐牧聞逆賊逃遁已逾阿爾台山嶺仍由額格
地方前進來至塞楞格河同扎薩克根敦貝勒
車蘇隆等部落於南北兩岸駐牧山嶺險峻樹
木叢繁更兼河流深濶占據要害可以禦敵奏
入報

聞

北路軍營將士擊敗準噶爾賊夷於蘇克阿勒
達瑚得

旨議叙喀爾喀貝勒策卜登扎薩克台吉齊巴克扎卜
根丕勒齊旺協理台吉巴海額默根羅卜藏及
弁兵等俱賞賚有差

雍正十年壬子春正月丁卯

甘肅巡撫許容請禁諸部內移

許容奏言臣以沿邊要地或有蠢動加意防範
今准甘提涼鎮各咨稱准署督臣今貝勒丹衷
在阿拉克山阿勒坦特卜什等處駐牧並准其
部下人等至邊內貿易又據肅州報稱遵奉署
督臣安插公巴濟旗下領催哈喇等戶口於哈
魯鼎地方給以米麩茶封又據寧夏道府報稱
奉署督臣遵

旨安插公通摩克公巴濟人衆於阿拉善山後並將喀

爾喀部落扎薩克台吉鄂木布濟扎薩克台吉
多爾濟王格勒克雅木丕勒公拉旺公完舒克
等一體安插支給米麪茶封近又據地方官稟
報鎮夷口內紅布湖地方住有夷帳云是巴濟
公部落為賊衆迫脅逃避內地臣聞鎮夷口外
之巴濟公已叛歸準噶爾而伊等部落言稱避
賊豈可深信置之內地恐至藏奸且寧夏地土
平漫僅隔一阿拉善山並無險要涼之鎮番孤

懸塞北自涼抵肅徑竇繁多外通邊牆而諸夷漸次逼處人心難測在查即阿宋可進自必悉心籌畫防範嚴密而臣總總過慮殊懷隱憂請嗣後塞外附屬諸夷未奉

諭旨安插而伊等口稱避賊內徙者不許縱令入口即有力量單弱不足禦賊而勢當應援者寧可遣兵追護不宜拔帳近移伏惟

聖裁奏入報

聞

乙亥

上諭大學士等曰張家口外領兵駐劄之都統薩穆哈
著來京令都統綽奇副都統宗室滿珠錫禮前往綽
奇所管鑲藍旗事務著平郡王福彭署理

丙子

命給被掠王格勒克雅木丕勒公通摩克等產業口糧
署陝西總督查郎阿奏言臣遵

旨委遊擊朱奇芳等出口至阿拉克山貝勒丹衷處派
人協同詢問公通摩克等遷移游牧之故今據
朱奇芳等稟前至諾顏哈喇見公通摩克回稱
王格勒克雅木丕勒在錐崙地方駐牧公拉旺
欲往哈魯鼎去扎薩克台吉鄂木布濟并巴濟
旗下佐領翁鄂柴等俱欲往綽確去此等地方
俱於阿拉善山甚近扎薩克台吉多爾濟與我
附近駐牧扎薩克台吉錫里扎卜仍在古爾班

塞堪我等產業牲畜俱被逆賊搶劫屬下之人
漸至饑餒無居住帳房仰懇給發口糧等語
臣查諾顏哈喇等處係喀爾喀游牧之地於哈
魯鼎阿拉善山甚近臣暫將王格勒克雅木丕
勒併公通摩克人等酌量給發茶麪帳房等物
其作何料理安插之處伏祈

皇上勅部議覆施行奏入得

旨大學士等議奏尋議王格勒克雅木丕勒公通摩克

等被賊劫掠今游牧俱係於諾顏哈喇等處駐
劄應派章京一員動支戶部銀二萬兩馳驛前
往將王格勒克雅木丕勒公通摩克屬下查明
戶口善加撫育台吉及屬下之人每家各賞牛
羊牲畜每人賞給銀六兩以製帳房其所賞之
牲畜於未滋生之前行文查郎阿交與寧夏官
員等辦理一年口糧賞給奏入得

旨公通摩克率屬下之人向內移行路遇賊人搶掠人

口牲畜甚為可憫王格勒克雅木丕勒之戶口牲畜亦被劫掠著賞給二人銀各一千兩以為立產之具餘依議

庚辰

署陝甘總督查郎阿奏防範哈喇等事宜

查郎阿奏言據大學士等咨稱甘州係沿邊要地阿拉善山亦附近寧夏領催哈喇等二十七戶係叛逆輝特公巴濟屬下安插於此究有未

便應飭令甘肅文武員弁嚴加防範不時稽查
將來作何安插之處再行酌議臣即密令甘提
臣宋可進寧夏鎮臣李繩武等會同文員加謹
防範小心查察令酌量安插於附近邊牆之內
嚴加管轄以固疆圉奏入報

聞

辛巳

厄魯特郡王額駙塞卜騰旺布移住喀爾喀河

命賞賚有差

大學士等議奏據厄魯特郡王額附塞卜騰旺
布告稱屬下人等現存游牧處有四百二十戶
其內有十四宰桑若將伊等移住內地其中未
出痘疹者多未免恐懼但現在游牧又與賊交
界伏乞

皇上施恩往東移於喀爾喀河附近居住甚便至屬下
人等牲畜並無倒斃傷損力能遷移等語應如

所請移住於喀爾喀河地方伊屬下人等既稱
牲畜豐足力能遷移不必更加賞給奏入得

旨塞卜騰旺布屬下人等不隨逆賊誠心歸附伊主甚
屬可嘉著加恩賞給宰桑等銀各一百兩屬下人等
每戶銀十兩塞卜騰旺布感念朕恩不受準噶爾賊
人之欺誘屬下逃竄又効力往追著加恩賞銀一千
兩

癸未

鏡兒泉哨兵被傷

命議處寧遠大將軍岳鍾琪等

岳鍾琪奏言臣因入冬以來積雪甚深嚴飭卡
倫之弁兵祇令登城瞭望不許分遣遠哨乃駐
防鏡兒泉副將馬順陽奉陰違擅遣弁兵遠出
巡哨以致城北山內兵丁突遇賊夷被傷二名
衝失一名副將馬順隨遣遊擊楊玉守備張嵩
先後帶兵追趕賊夷遠遁其違令之副將馬順

理合叅奏奏入得

旨鏡兒泉卡倫離軍營不及百里駐兵不少賊來即至
傷失兵丁一任遠遁岳鍾琪是何防範且安設卡倫
原為巡探如雪霧黑夜尤宜加意若止令登城瞭望
不許分遣遠哨以為恐有疎防是必將待賊臨城而
後防矣是何軍令岳鍾琪不知自咎僅以副將陽奉
陰違為詞朕實不解將岳鍾琪與副將等交部嚴察
議奏

甲申

命給駐劄古爾班賽堪將軍達爾濟建勲將軍印賞銀

二千兩

命議叙追勲準噶爾賊人功科爾沁郡王羅卜藏喇錫

巴林郡王桑里達扎賴特貝子特古斯翁牛特貝子

羅卜藏敖漢公額駙羅卜藏喀爾喀公敏珠爾屠巴

巴木丕勒多爾濟扎薩克台吉旺扎爾旺布達什丕

勒根敦諾爾布扎卜齊旺扎卜特克什策卜登喇卜

卷二十八
坦等各賞賚有差

寧遠大將軍岳鍾琪請築城木壘駐兵

從之

岳鍾琪奏言去年襲擊賊夷沿途細看有木壘
地方形勢險要兼可屯種若於此建築城池駐
兵二萬賊兵斷難飛渡而東再於巴里坤駐兵
一萬於魯克察克闢展等城添設官兵足一萬
之數如此則賊兵來時我軍互為犄角前後邀

截可令大創而去若將來木壘駐兵有未協之處請將臣置之重典妻子從重治罪奏入得

旨木壘果為要隘之地可以堵截賊人來路又與魯克察克等處互為聲援著照所奏定議舉行

丙戌

命選西北兩路將弁兵丁派往木壘等處

上諭大學士等曰木壘駐兵一事最關緊要若大將軍岳鍾琪定議舉行可於綠旗兵丁內揀選二萬名遣

往其魯克察克等處應添兵若干亦酌量派出西路
蒙古兵丁較少應酌議添撥以資行間之用前京城
派往之驍勇兵一百名巴爾虎兵一百名額駙阿寶
屬下兵丁五百名俱著派去軍營所有歸化城之土
默特兵丁內挑選五百名鄂爾多斯兵丁內挑選三
百名一併帶往再北路副都統達什帶去察哈爾兵
一千名亦著往西路原任總管班第給與副都統職
銜令其與達什一同管領達什班第二人各賞銀一

千兩其察哈爾兵弁著順承親王酌量每人賞給銀
兩俾其行裝寬裕給與馬匹於二月杪三月初由阿
濟一路前去至阿寶之兵前曾降旨令於今春撤回
本游牧處今既留在軍營著大將軍岳鍾琪量加恩
賞可即傳諭兩路大將軍知之又

諭曰侍郎顧魯軍前効力有年著授為內大臣在西路
叅贊上行走賞銀一千兩又

諭曰綏遠將軍馬爾賽至軍營時著副都統阿岱前赴

順承親王處在叅贊上行走

丁亥

命封公袞布為固山貝子

上諭理藩院曰厄魯特郡王額駙阿寶之子公袞布在西路軍前甚屬効力著加恩封為固山貝子

平定準噶爾方略前編卷二十八

欽定四庫全書

平定準噶爾方略前編卷二十九

雍正十年春二月己丑朔

命踏勘翁金附近修城事宜

上諭大學士等曰據奉差原任巡撫布蘭泰奏稱翁金修城地方並無樹木土少沙多不能修城等語翁金係通軍營大路適中之地其附近地方或有可以修城之處即離驛路稍遠但可掘井取土即可修城著

交與驛站官員踏勘奏報

辛卯

命公博爾屯為叅贊赴扎克拜達里克

上諭大學士等曰推河駐防之二千蒙古兵丁著侯馬
蘭泰管理公博爾屯著往扎克拜達里克在馬爾賽
叅贊處行走

議伯格爾駐兵事宜

大學士等遵

旨議奏曰伯格爾在察罕廈爾西南扎克拜達里克正
西賊若由阿爾台阿爾穆克圖布拉罕巴爾楚
克阿濟必濟等處走額濟內道必出此實為賊
人出沒要路請於此駐兵萬人可以阻截北路
軍營西南一帶賊人且其地去察罕廈爾扎克
拜達里克僅三四百里應援亦便又屬古爾班
賽堪總口應請令建勲將軍達爾濟以原撥往
古爾班賽堪兵五千人移駐伯格爾再扎克拜

達里克現有家選兵二千綠旗兵五百應令左
副都御史阿成阿率往益之並令大將軍順承
親王於扎克拜達里克及察罕廈爾軍營調綠
旗兵二千五百人赴伯格爾以足萬人之額令
達爾濟統轄奏入

上從之

壬辰

辦理哈密事務員外郎永恒等奏報擒獲賊人

孟克情形

永恆等奏言正月二十二日準噶爾賊人來犯
哈密臣等從城上望賊勢甚衆周城四五里不
便輕敵貝子額敏選回兵精壯者設伏城外擒
賊人孟克訊之云賊中領兵者為塞卜騰策凌
那木扎爾等聞哈密牲畜衆多發兵六千由烏
魯木齊來攻臣等日夜守城相機勦殺所獲賊
人令貝子額敏守之奏入報

聞

甲午

命費雅思哈等赴推河塔爾瑪善等赴伯格爾軍營

上諭大學士等曰費雅思哈伍什巴著往推河地方與
侯馬蘭泰一同領兵駐劄其伍什巴所管兵丁著護
軍叅領委三代管副都統塔爾瑪善著同阿成阿前
往將軍達爾濟軍營在叅贊上行走

庚子

寧遠大將軍岳鍾琪奏報援勦擊賊情形

命速議木壘築城駐兵事宜

先是岳鍾琪奏言據辦理哈密事務員外郎永
恒查斯海副將焦景璇貝子額敏等稱正月二
十一日鴨子泉卡倫有賊二百餘人往來二十
二日賊兵逼哈密城登城望賊約有三千餘人
臣計哈密有副將焦景璇率官兵千五百人駐
防又有叅將韓良弼率山西綠旗兵八百駐城

中足以固守但賊既逼哈密自當遣兵截殺臣
即遣總兵官曹勦等率綠旗兵五千日夜趣輝
魯圖達巴罕五堡處截其尾又遣總兵官張豹
率官兵二千趣科舍圖嶺前後並赴哈密應援
又據永恒等報云二十三日城外賊兵漸少其
大隊悉西西喇呼魯蘇向東北沿山一帶赴塔
勒納沁臣計塔勒納沁有提督顏清如率兵四
千駐劄城中可以固守又令總兵官曹勦等於

西喇呼魯蘇一帶扼據險要相機掩殺臣又虞賊或由摩垓圖爾庫勒諸路竄入北山逃遁歸巢按北山正西並西北有兩路一巴哈恩度爾一察罕春集悉賊人必經之處臣更遣副將軍石雲倬及原任兵部尚書馬會伯率綠旗兵三千二百赴巴哈恩度爾一路設伏署鎮安將軍卓鼎及前鋒統領宗室哈爾吉副都統僧保張正文等率驍勇官兵暨八旗滿洲兵凡三千

八百赴察罕春集一路設伏副將軍常賚及都
統根敦總兵官張仁孝等率滿漢兵三千二百
赴烏克克嶺截殺臣等軍營士馬現在準備策
應又奏言據駐劄塔勒納沁提督顏清如陸續
報稱正月二十三日賊據天生圈山口先遣叅
將米彪率兵六百赴三道大坂防護馬廠即督
兵守城自辰至酉賊始退走西北山下二十四
日米彪率兵至白楊溝一帶與賊遇賊敗又遣

副將陳經綸率官兵一千五百人出城擊賊賊人由西南故路而遁陳經綸率兵往追沿途搜勦臣以賊人舉衆深入塔勒納沁一帶意在擄掠牲畜現今軍營所留馬匹騾頭悉在山南四道溝畢留大坂中牧放官兵防護嚴密牲畜無損至是又奏言臣令總兵官曹勦及副將紀成斌等率兵應援哈密於正月二十七日將至二堡正遇賊人大隊約五千餘奮勇進擊交戰一

日夜二十八日賊登山拒我曹勦等四面仰攻
爭先力戰自卯至午賊衆大潰殺傷無算奪其
馬匹牛羊并援出所掠兵丁及漢回商民數百
人餘賊由沙磧遁逃而西曹勦率兵直抵二堡
下營二十九日曹勦自二堡至柳樹泉總兵官
張豹及哈密副將焦景璽塔勒納沁副將陳經
綸等與曹勦軍合乘夜追勦臣計賊人腹背受
敵殘喘奔逃必走烏克克嶺臣已檄知副將軍

石雲倬常賚署鎮安將軍卓鼎等發滿漢兵六千到烏克克嶺南山口梯子泉一帶截殺仍著總兵官曹勦率官兵在沙棗泉駐劄以張聲勢謹以大捷緣由奏報奏入得

旨大將軍岳鍾琪奏報各路撥派官兵進剿堵截及總兵曹勦等擊敗賊人之信調度有方運籌亦備官兵并兵丁奮勇効力擊敗賊衆朕心嘉慰惟是曹勦領兵一路正當賊鋒其所帶兵丁稍覺單弱而勇健將弁

亦覺尚少再賊人若由烏克克嶺逃遁則有常賚石
雲倬等堵邀擊殺假若敗殘餘賊由沙磧而遁必由
柴達木經過吐魯番之官兵早能得信與回民併力
邀擊豈不更善又木壘駐兵一事朕已降旨與岳鍾
琪令其計議舉行則吐魯番回民遷移之事可以緩
商至木壘築城若事在必行以速為善今賊夷受創
而去乘機動工更覺順便並令岳鍾琪速議奏聞

丙午

命正陳泰之罪

大學士等議奏言陳泰世受

國恩身為叅贊傳爾丹統兵進勦時令率兵二千
在科卜多河岸駐劄以備敵兵乃陳泰一聞索
倫逃兵訛言即畏懦領兵回扎卜堪後經傳爾
丹屢次催調陳泰惟事推諉又不即赴科卜多
殊干法紀應照律擬斬秋後處決行文軍營令
將陳泰解送來京交刑部監候奏入得

旨陳泰之罪斷無可赦著照擬處斬即在軍營監禁至
秋審時擬為情實具奏俟命下之日再行正法

丁未

命免西寧煤稅

上諭內閣曰朕聞西寧北川口外白塔地方出產石煤
係附近漢土番回民人挖取販賣以為生計每馱納
稅錢三十文西寧府委員收解充餉約計每年收銀
一千九百餘兩近因西陲用兵之際西寧移駐兵弁

較前為多率皆用煤以供炊爨煤價漸至昂貴若仍照例徵收稅銀恐價值不能平減於兵民均有未便著將應收稅銀寬免該督撫轉飭有司實心稽查倘胥吏人等有照舊私收或借端需索者務令察出治罪

辛亥

西路副將軍石雲倬失機

命革職議罪

寧遠大將軍岳鍾琪奏言準噶爾賊人由五堡之南沿沙磧敗遁若尋有水草之路必繞至烏克克嶺迤西奔竄臣前派副將軍常賚石雲倬所領之官兵六千餘名俱於正月二十九日午未時齊至烏克克嶺臣與副將軍常賚面議官兵一到烏克克嶺略為歇息即令石雲倬選兵四五十名先赴梯子泉一路截殺署鎮安將軍卓鼎率滿兵三千隨後接應其餘官兵令常賚

帶領守截烏克克嶺山口三十日午後賊人適在山口二十里屯住石雲倬等如即遣發官兵乘夜潛襲滅此自不待朝食詎料初一初二等日杳無捷音至初三日始據卓鼎咨稱初一日賊兵業已逃竄初二日即遣驍勇官兵近搜遠捕賊人從洮賚大坂之西越向納呼山遁歸臣思將軍三員率兵萬餘乃觀望不前以致賊人驚覺遠颺深為駭異及副將軍等陸續撤兵回

營詢其情節據常賚卓鼎等同稱三十日午後見有賊人屯住山口石雲倬總不發兵直至戌時始派兵一千五百名令總兵官張存孝帶領在山下等候又數次遣人攔阻不許前進石雲倬安寢帳房初一日天明始領兵東行十餘里隨即安營造飯煎茶纔轉西而行張存孝至賊人屯住之處餘火未息報稱賊人竄遁不遠請其速行前進追勦石雲倬又傳令撤兵不許追

襲臣以梯子泉一帶實逆賊歸巢之要路又慮
烏克克嶺之西南尚有塔呼納呼一路亦係賊
人歸途務須派兵堵截有涼州右營外委馬得
玉乃熟識塔呼納呼道路之人令其馳赴行營
聽候發兵領路不料石雲倬大怒以馬得玉為
多事欲行責治並不發兵邀集賊人果由塔呼
納呼一路逃歸坐失機會石雲倬乖戾僨事臣
實難代為隱諱不得不據實奏

聞奏入得

旨辦理軍機大臣嚴察議奏尋議曰石雲倬應革職交
與岳鍾琪同常賚卓鼎等詢明確供解京按律
究擬奏入

上從之

壬子

命增撥駐劄伯格爾蒙古兵

上諭大學士等曰派往伯格爾地方之蒙古兵丁甚少

著於鄂爾多斯六旗內再派一千帶領前往仍照前
令王查木陽協理台吉策旺多爾濟額默根等會同
該扎薩克選派俟整束行裝完備即與王查木陽所
領二千兵一同起程著王查木陽等於六旗協理台
吉大員內揀選人去得能管轄兵丁者二員再酌派
官員帶領前往王查木陽若已起程著六旗扎薩克
貝勒貝子公台吉等會同選派務將器械馬匹辦理
整齊令其起程其賞賜兵丁銀兩另派員隨後送往

訓飭寧遠大將軍岳鍾琪

上諭大學士等曰據大將軍岳鍾琪奏報賊人從納呼
一路遁逃并撤兵回營各情由此大賊夷狂肆昏亂
深入重地投身羅網乃自速滅亡也我師旣以逸待
勞且我衆彼寡但能申明軍紀要截擊殺並不必奇
謀異算斷不致免脫狼奔今乃坐失機會不但不能
屠勦且使賊人由坦途而遁此實朕與廷臣意料所
不及者其領兵之石雲倬已降旨治罪至大將軍岳

鍾琪素諳軍旅本非庸材緣懷游移之見致乖戰守之宜前車之鑒非止一端嗣後當深悟前非痛自省惕先事綢繆臨事堅定壹號令以振軍威示威信以齊衆志庶可以奏膚功而收後效朕猶深望之

癸丑

命暫緩木壘駐兵籌畫吐魯番軍糧

上諭大學士等曰前議三四月間木壘築城駐兵一事已降旨大將軍岳鍾琪令其酌量辦理今再四思維

以數萬官兵移駐木壘春間馬駝既恐臙力不足且時日稍覺忙迫未必事事皆能就緒不若遲至六月夏秋之交將諸事預行慎密辦妥大兵迅發一舉可成將來預備兵丁之時須出其不意速完城工則戰守皆易矣木壘駐兵之舉既緩則吐魯番之兵糧當急為籌畫吐魯番既有官兵三千名若再加三千名則軍勢益壯不但可以保護回民即將來未稼在野之時賊人前來踐踏我師合回衆擒剿之亦易為力

此時發兵三千前往就便可以將米糧運送或由沙磧小路零星運往亦可倘僱哈密之人運送而令吐魯番之人接應皆照數給與腳價著岳鍾琪悉心妥議辦理

命福建總督劉世明貴州巡撫張廣泗赴西路軍營上諭大學士等曰西路軍務關係緊要軍營之中協辦大臣甚少福建總督劉世明於西邊情形素所諳悉著馳驛來京面請訓旨前赴軍營先賞藩庫銀一萬

兩製辦行裝又

諭曰西路副將軍石雲倬已革職議罪朕欲於各督撫
提鎮中簡用一人前往軍前協辦軍務貴州巡撫張
廣泗才幹優長實心任事數年以來苗地用兵該撫
親歷戎行深諳軍務著即馳驛來京面請訓旨前往
軍營為副將軍賞藩庫銀一萬兩製辦行裝

命暫停撤土默特兵守臺站者

上諭大學士等曰從前因歸化城留兵甚少諭令副都

統圖爾賽等帶領土默特一千兵前往照看臺站俟
馬爾賽所領兵丁至扎克拜達里克時將土默特兵
丁撤回貝勒僧袞扎卜等領往之喀喇沁一千兵令
駐劄臺站今噶斯一路土默特兵丁俱經撤回歸化
城歸化城旣已添兵圖爾賽等領去之土默特一千
兵著暫行停止撤回仍令看守臺站喀喇沁一千兵
丁著往扎克拜達里克地方屯劄候音

甲寅

命以護軍統領職銜吉當阿署綏遠將軍馬爾賽軍營
前鋒統領以副都統塔爾瑪善署建勲將軍達
爾濟軍營前鋒統領

乙卯

命賞卹塔勒納沁哈密等處出征及陣亡兵丁

上諭大學士等曰賊人侵犯哈密塔勒納沁等處所派
官兵征勦堵截其中多有步行者雖因將領無能觀
望退縮致令賊衆逃遁而兵丁之奮力前驅勤勞實

堪軫念著大將軍將大營塔勒納沁哈密等處此次
出征之兵丁查明分別賞賚其陣亡受傷之兵丁尤
可憐憫著查明照例賞卹

命優賞禦賊回民等

上諭大學士等曰哈密被賊侵擾回民等併力抵禦甚
屬可嘉聞其在外牧放之牲畜一時不及收回者被
賊人盜去雖據報賊遁之後仍將牲畜奪回但恐遺
失倒斃者已多朕心深為軫念其遺失牲畜之頭目

同民等著賞銀一萬兩守城禦賊者著賞銀五千兩
按名分給其擒獲賊人者優加賞賚務令均沾恩澤

丙辰

命暫留欽拜等於扎克拜達里克及伯格爾授阿思哈
等副都統職銜

靖邊大將軍順承親王錫保奏言臣等欽奉

皇上諭旨以現在軍前大臣甚少恐不敷調遣命於軍
營營總等官中擇有可勝副都統護軍統領任

者令臣等密封題奏今有新調吉林佐領委署
前鋒翼領阿思哈同額駙策凌効力行間黑龍
江協領委署前鋒翼領布爾沙科卜多進兵時
奮勇奪據山嶺効力尤著率領新調右衛兵丁
叅贊內大臣伯欽拜實心辦事善於約束馬爾
賽處副都統塔爾瑪善從前在阿爾台巴里坤
兩處軍營俱屬効力請賞給阿思哈布爾沙副
都統職銜令欽拜塔爾瑪善前來察罕度爾軍

營奏入得

旨馬爾賽辦事甚不愜朕意扎克拜達里克軍營全賴
欽拜一人伯格爾地方駐劄大員內亦無歷練之人
故授塔爾瑪善為達爾濟軍營叅贊并委署前鋒統
領著將欽拜塔爾瑪善暫留扎克拜達里克伯格爾
地方阿思哈布爾沙著照順承親王所請俱授為副
都統職銜

三月戊午朔

命加賞坐卡兵丁

上諭大學士等曰坐卡兵丁專司瞭望哨探之事較之
在營駐劄兵丁更為辛苦且汎地離營既遠市買鹽
菜未免多費著傳諭大將軍岳鍾琪除三大卡倫外
其他各處坐卡兵丁每月加賞銀一兩羊價七錢俾
伊等食用充足以示朕格外加恩之至意嗣後儻再
有疎忽貽悞之事定行從重治罪其如何挑選輪班
之處聽大將軍酌量辦理

戊辰

寧遠大將軍岳鍾琪奏報獲賊巴顏所供情形
岳鍾琪奏言據馬廠遊擊龍有印檻送所獲準
噶爾賊人巴顏等供稱領兵來犯哈密係台吉
塞卜騰及小策零敦多卜之子策凌那木扎爾
等噶爾丹策零去年九月調兵六千會於烏魯
木齊到奇台附近過冬今年正月十二日由奇
台起程於二十日夜過烏克克嶺前赴哈密其

侵阿爾台兵去年十一月間小策零敦多卜歸
哈喇沙爾大策零敦多卜之子曼濟在博東齊
過冬現今哈薩克兵擄準噶爾七百餘戶噶爾
丹策零已撤曼濟還欲令發兵赴哈薩克部謹
錄供繕奏奏入報

聞

壬申

賞阿霸垓郡王扎木巴勒扎卜等並

命吳禮布等前往會同訓練兵丁

上諭辦理軍機大臣等曰據管轄烏珠穆秦等十旗扎薩克兵丁之阿霸亥郡王扎木巴勒扎卜等奏請自京派遣大臣同伊等管轄兵丁吳禮布著賞與護軍統領職銜巴特瑪授為侍讀學士前往會同王扎木巴勒扎卜等訓練兵丁尋

命賞阿霸亥郡王扎木巴勒扎卜銀一千兩貂帽貂皮短褂坎袍各一烏珠穆秦鎮國公朋蘇克喇卜

坦銀五百兩貂帽狍皮短褂皮袍各一

丁丑

命議處寧遠大將軍岳鍾琪

大學士等劾奏言據寧遠大將軍岳鍾琪奏報
賊人敗遁及臺站牧廠情形諸摺情詞互異前
後舛謬岳鍾琪以烏克克嶺為賊遁歸必由之
路其梯子泉地方即賊鋌而走險之道則當派
撥兵丁時即應指定兩處酌遣官兵邀截而必

侯已至烏克克嶺始令往梯子泉并令石雲倬等略為歇息是賊人之得從塔呼納呼潛遁而歸者雖石雲倬之罪而岳鍾琪亦難辭咎也又前奏塔勒納沁各廠看守甚嚴賊人一無所得後又奏報失去牲畜并各廠弁兵亦有傷損且云截殺賊人收回羊馬所得足償所失覲然不以為恥殊非人臣奏對之體又烏克克嶺離軍營僅九十里賊兵過嶺而軍營茫然不知所設

坐卡兵丁此時何在且鏡兒泉廋集察罕哈瑪
爾復設三大卡倫專為探信而設乃一無聞見
則平日所云傳遞號炮頃刻可至者尚足恃乎
當草枯馬瘦之時賊以五六千人入我卡倫越
過軍營直至塔勒納沁我兵三萬餘衆週圍密
布既任其來復任其去賊並不奔沙磧竟由小
路而去似此玩忽縱賊奏報不實深負

聖恩有玷倚任請將岳鍾琪

勅部嚴加議處奏入得

旨該部嚴察議奏

已卯

勅諭拉達克汗德中納木扎爾

上諭曰朕統御震區內外視為一體凡撫卹遠人獎勵
恭順懲治悖逆皆朕分內事也爾德中納木扎爾遣
使向辦理藏務大臣等呈稱臣惟以辦理國事尊崇
佛教量力行走探取葉爾羌準噶爾處信息報知貝

勒頗羅鼐轉行奏達乞早降恩諭等語朕覽之甚為
嘉悅從前因爾父尼瑪納木扎爾與貝子康濟鼐同
心報効朕已沛恩膏今爾亦效法爾父與貝勒頗羅
鼐一體効力甚屬勤勞嗣後益加黽勉以紹前徽則
永享朕恩於無既矣茲特頒恩賜賞給緞疋等物爾
其祇領特諭

辛巳

命免黜敏珠爾多爾濟等爵革成滾扎布一等台吉

理藩院遵

旨帶領軍營被劾之喀爾喀郡王敏珠爾多爾濟等引
見得

旨軍前退縮之罪例不容寬但敏珠爾多爾濟患病是
實未能領兵前往以致伊旗下派出之兵半被賊兵
截回念伊祖墨爾根濟農首先來歸其功甚大蒙我
聖祖皇考優恤今伊獲罪之故亦屬可原免其革退王
爵著另派賢能台吉前往軍營管伊旗下兵丁俟伊

病痊時再赴軍營効力贖罪扎薩克台吉鄂木布濟
私離汛地罪固難寬但為賊人截阻不能通信回歸
游牧嚴行保守使賊人秋毫無犯且人亦去得免其
革退扎薩克台吉著與王格勒克雅木丕勒一同管
轄屬下兵丁前往建勲將軍達爾濟處効力贖罪成
哀扎布由科卜多地方逃回後奉調軍營又未前往
人亦不及著革退一等台吉

丙戌

命加恩軍營裁汰老疾官兵

靖邊大將軍順承親王錫保等奏言臣等遵

旨將軍營年老殘疾人等詳加察閱京城八旗奉天吉林黑龍江右衛寧夏察哈爾歸化城喀喇沁土默特等處并防戍綠旗弁兵等官弁共五十九員兵丁共一千五百五十二名俱係殘疾候青草出時酌量辦理發回各該旗該地方等處辦理軍機大臣等議覆如所請奏入得

旨裁汰官兵內効力被傷著有勞績若俱行革退甚屬
可憫著各該管大臣等察明題奏官員賞給半俸兵
丁賞給半餉官兵內如有病痊可以起用者奏聞請
旨

丁亥

申飭寧遠大將軍岳鍾琪

上諭辦理軍機大臣等曰朕覽大將軍岳鍾琪陸續奏
摺知官兵騎赴軍營之馬及塔勒納沁等處牧放之

馬有沿途疲瘦倒斃者有傳染時疫委棄者有被賊人劫奪者現今存剩馬匹寥寥無幾夫以多年購買預備之馬匹而棄之有如草芥其咎將誰歸乎又據岳鍾琪奏稱木壘駐兵俟所調駝馬到營之日即速起程等語口內解送之馬遠涉長途不令休息即欲驅使前赴木壘其力實有不能目今口內駝馬陸續解送軍營賊人探知必又生窺伺之念且將來移駐木壘之後所有駝馬牲畜甚多如何收放布置以防

偷盜岳鍾琪須悉心籌算思患預防無得仍蹈前轍
再者朕聞軍營中自大將軍以及將弁皆用兵丁之
力伐木取土蓋造房屋兵丁等雖勉供使令而退有
怨言夫兵丁身列戎行枕戈荷戟冒鎗衝鋒是其職
業至於興作力役非其事也是以從前築城時凡兵
丁等之情願傭工者朕皆照數給與工價而不忍輕
用其力將弁欲蓋造房舍自當捐已資以僱夫役豈
可圖一身之便安而不恤兵丁之勞苦使伊等操練

辦公之外復竭蹶以供其私役予從來為將帥者與
士卒同甘苦然後可以得其歡心而鼓其銳氣今軍
營之行事如此豈不與古人領兵之道相左乎將來
移駐木壘時倘有復蹈前轍者經朕訪聞必加嚴譴

夏四月壬辰

命加恩酌增西路攻戰耕屯兵丁口糧

上諭辦理軍機大臣等曰西路兵丁口糧從前議定每
名日支粟米八合三勺或炒麪一斤駐劄之時本無

不足惟有事行走及對敵之際晝則追奔攻擊夜則
防範巡查非駐劄之時可比恐舊數稍有不敷嗣後
凡遇此等日期著每名日支粟米一升其應支炒麩
之日每名日支一斤四兩俾兵丁等口糧寬裕以昭
朕格外加恩之至意至分派屯種各兵耕耘播耨胼
胝為勞其耕種之一月內所支口糧亦照行走攻戰
之兵米麩一體增給著即傳諭大將軍岳鍾琪等知
之

己亥

命豫辦駐兵木壘事宜

上諭辦理軍機大臣等曰大兵移駐木壘選得六月初四日巳時從大營起行爾等可傳諭岳鍾琪將一應事宜豫先留心備辦但軍營切宜慎密以防漏洩

乙巳

命降岳鍾琪爵為三等侯戴罪立功

兵部遵

旨議覆大學士鄂爾泰等劾奏寧遠大將軍岳鍾琪玩忽縱賊奏報不實應行議處按岳鍾琪身為大將軍專制邊疆賊夷以五六千人從烏克克嶺入我卡倫侵犯哈密岳鍾琪茫然不知令賊劫掠牲畜從塔呼納呼緩騎遁歸岳鍾琪智不能料敵於平時勇不能殲敵於臨事律之軍法百喙難辭應削去公爵并革去少保世職暨總督職銜仍令暫護大將軍印務以圖後效奏入得

旨岳鍾琪著削去公爵并革去少保降為三等侯仍留
總督職銜護大將軍印務戴罪立功

平定準噶爾方略前編卷二十九